

मारवाड़ी तिमाई पतरिका

अक्टूबर ऊं दिसम्बर-2019



बणावण आळा:-

गंगाराम अर रतन लाल योगी

मदत करणाळा:-

मुकेश कुमार योगी अर
मारवाड़ी समुदाय

* जे थे जीत गया तो राजी हो जावोला
अर जे हार गया तो समझदार हो
जावोला।

* लोग थोने थारे कामऊं जाणें है, इण
वास्ते ध्योन हमेसा परिणोम माथे
राखो।

सरकारी योजना

राजस्तोन सुभ सगति योजना

कवारी बेटी या चेनित लुगाई ने 55000 रुपियों री सहायता रासि इण योजना में मिळे है। इण रुपियो रो उपयोग लुगाई/छोरी आपरे काम धन्धे या आपरे ब्याव में काम ले सके है।

योजना रे वास्ते योगता

- * छोरी रा मा-बाप कमऊं कम एक साल ताई उण एरिये में पंजिकरत हिताधिकारी मजूर होणा जोईजे है।
- * अधिकतम दो छोरियां या चेनित लुगाई ने अर एक छोरी ने आ रासि मिळ सके है।
- * छोरी री उमर 18 साल अर कंवारी होणी जोईजे है।
- * चेनित लुगाई या छोरी आठवीं पास होणी जोईजे है।
- * चेनित लुगाई या छोरी रे नाम रो बैंक में बचत खातो होणो जोईजे है
- * हिताधिकारी रे खुद रो मकोन होवे जणे घर में सौचालय होणो जरुरी है।

दुजी सर्तो

- * फार्म भरण री तारिखऊं पेली हिताधिकारी एक साल ताई कमऊं कम 90 दिन ताई निर्माण मजूर रे रुप में काम करियोडो होणो जोईजे है।
- * आ रासि हिताधिकारी ने निर्माण मजूर रो सत्यापन होणे रे पछे ई दी जावेला। निर्माण मजूर रो सत्यापन तेसीलदार, विकास अधिकारी, सहायक या उच्च अधियन्ता, सरकारी स्कुल रा हेडमासाब या राजपतरित अधिकारी कर सके है।
- * आ रासि लुगाई या छोरी आपरे विकास, पडाई, कामधन्धो या ब्याव वास्ते काम ले सके है।
- * खुद रो धन्धो सरु करण या व्यवसायिक सिक्सा प्राप्त करण वास्ते जरुरी सलाह दी जावेला।
- * योजना रो लाभ लेवण वास्ते चेनित लुगाई री तरफ ऊं निर्धारित प्रपतर में आवेदन चेनित होवण रे एक साल पछे फार्म भर सके है।
- * आ जरुरी है के योजना रो आवेदन जमा करते टेम आवेदनकर्ता रो परिचे पतर चालु होणो जोईजे है।

फार्म भरण री सीमा

आवेदन पतर हिताधिकारी री तरफऊं पजियन री तारिख ऊं एक साल पूरो होणे पछे या कवारी छोरी री उमर 18 साल होणे रे 6 महीना पेली या योजना लागु होणे री तारिख ऊं 6 महीना ताई या छोरी रो ब्याव रे 6 महीना पेली फार्म भर सको हो।

जरूरी कागद

- * स्थायी परमाण पत्र (मूलनिवास)
- * राजस्तोन री जागरिकता परमाण पत्र
- * आठवी री मारकसीट
- * आय परमाण पत्र
- * गैर-आय कर डेटा परमाण पत्र
- * बीपीएल री फोटोकॉपी
- * आयु परमाण पत्र
- * जाति परमाण पत्र
- * आधारकार्ड/भामासाह कार्ड
- * बैंक खाता पासबुक



फार्म जमा करणो

- * फार्म भरण वास्ते अधिकारिक वेबसाईट ऊं फार्म डाऊनलोड करणो पड़ेला। सुभ सगति योजना रो फार्म डाऊनलोड करियो पछे प्रिन्ट निकाल लो। पछे उण में जिकी जाणंकारी पूछी है बा सही-सही भरदो।
- * भरियोडो फार्म रे साथे उपर बतायोडका सब कागदो री फोटो-कॉपी लगान आपरे स्थानिय सरम(मजूर) कार्यालय या मण्डल सचिव रे अधितरत और कोई विभाग रे अधिकारी कार्यालय में जमा करादो।

लोकोक्ति

1. बाजरी ब्राढता काया होया जणे काले री बाढियोडकी भेळी करदो।
2. जोण मारे बाणियो, पेछाण मारे चोर।
3. सुणणी सब री पण करणी मन री।
4. डुब मरे बे तीन जणा- एक- तागत कम गुस्सो भारी, दुजो- गुंजी कम वोपार घणो, तीजो- मजूरी कम खरचो घणो।
5. आप भलो तो जुग भलो।

लोकगीत

बिटी म्हारे सोने री होती

बिटी म्हारे सोने री होवती, बिटी म्हारे रुपे री होवती

बिटी म्हारे जोधाणे घड़ाई, नगीना बिरसाळु दिराया

बाळक बनड़ी रा बन्ना, मुखड़े बोलो तो सरी।

बिटी म्हारे सोने री होवती, बिटी म्हारे रुपे री होवती।

अरे किकर बोलु ऐ नाजु, मुखड़े पान री बिड़ी

अरे मुखड़े पान की बिड़ी, हिरला लाल सु जड़ी।

बिटी म्हारे सोने री होवती, बिटी म्हारे रुपे री होवती।

अरे दोई दिन नानाणे रेती, दोई दिन दादाणे रेती

बिटी म्हारे सोने री होवती, बिटी म्हारे रुपे री होवती।

अरे दोई दिन पीवरिये रेती, दोई दिन सासरिये रेती

अरे बिटी म्हारी चिटु में रेती, बिटी म्हारी बगसा में रेती।

बिटी म्हारे सोने री होवती, बिटी म्हारे रुपे री होवती।

चुटकला

1) माटसाब- भुरिया हाथ कंगन को आरसी किया मुहावरे रो अर्थ बता।

भुरियो- जिकी लुगाई हाथ में कंगन पेरन स्कुटी चलावे उने पुळिसाळा आरसी रो नी पुछे है

मासाब- बारे जान मुरगो बिण जा।

2) एक बार एक पंजाबी टांके माई पड़गो

अटीऊं एक मारवाड़ी जावतो हो, आवाज आई जणे पुछियो कुण है भाई?

पंजाबी- अस्सी हॉं भाई।

मारवाड़ी- एक दो होता तो काड देवता पण अस्सी ने थारो बाप कुण काडे है? पड़िया रो माईने।

पेट में

गियोड़ो

जैर एक ने

मारे है पण

कोन में

गियोड़ो

जैर हजारो

ने मारे है।

सम्पर्क

निर्माण सोसायटी

तीसरी मंजिल, फ्लैट नम्बर तीन, गुलाब कोम्प्लेक्स
सच्चिदाय हेण्डलूम के पास, तहसील रोड़ औसियाँ,

जोधपुर राजस्थान-342303

फोन नम्बर-02922-274014

Email- rajasthanlanguages@nirmaan.org.in

Web- www.nirmaan.org.in